

## ROMAQ Pê Chyang Hun Kat é Laiká (Romans)

<sup>1</sup> Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luî, chyoyúng Chyúmdang pé má,

<sup>2</sup> Garai Gasang gi, hí hí mai Yhâng é myiqhtoî pé dông danggidiq byî to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huî é sù, ngò Poluq gi, Romaq myuq má nyí é, Garai Gasâng eq chyitdap é hui luî, sân-yúng bang dut râ matú ji yu é bang banshoq lé, dang kyô kat lhê.

<sup>3</sup> Yhâng é Yuqzo haû gi, byù hkyam dông ga jáng, Dawiq é awut ashín nghut ri;

<sup>4</sup> Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhûng é Yhumsîng Yesuq Hkrisduq nghut ri.

<sup>5</sup> Yhang dông mai le, Yhâng myîng é matú le, ngamoq gi, byù myû chângjup mai byù ji yù mù, lumjîng hkyô lé châng nyí nhâng râ matú, jeju eq lagyo ayá lé wó hkam yù bê nghut lhê.

<sup>6</sup> Nungmoq le, Yesuq Hkrisduq eq séng râ matú ji yù huî é bang má lòm bekô nghut ri.

<sup>7</sup> Nga-nhûng é Îwa Garai Gasang eq Yhumsîng Yesuq Hkrisduq chyang mâ é jeju eq nguingón hkyô gi, nungmoq chyang ru joq nyî sháng gaq ô!

*Poluq, Romaq Myuq Má Ló Kum Nau É Hkyô*

<sup>8</sup> Nungmoq é lumjǐng hkyô lé, mingkan gón má taí pyo ló bê nghut é yanmai, sâng-hi má, ngò gi, Yesuq Hkrisduq é myǐng mai, nungmoq banshoq bâng é matú, ngá é Garai Gasang lé, jeju hkya-on lhê.

<sup>9</sup> Ngá é kyûdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklum banshoq eq dojaú é Garai Gasang gi, ngá é saksé nghut lhê;

<sup>10</sup> Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô hting byi râ matú, ahkuí, ngò kyûdung lhê.

<sup>11</sup> Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kǐng byi râ matú, nungmoq lé gyai yhang myàng nau nyi ri.

<sup>12</sup> Haû su nghu é gi, nga-nhúng rayuq eq rayuq é lumjǐng hkyô dōng mai, nungmoq eq ngò, myit wum byí é hui râ matú nghut lhê.

<sup>13</sup> Gumang wuè ê, ngò gi, haû tǔngbaù pê chyáng mai ashi wó yu é eq rajung za, nungmoq chyáng mai le ashi wó yú râ matú, nungmoq chyáng lé jé râ nghû adàm dàm dâ wú é nghut kôlhang, ahkuí jé shoq hkûm tang pyám huí é hkyô lé, nungmoq lé sé nhâng nau ri.

<sup>14</sup> Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê.

<sup>15</sup> Haû nghut é yanmai, ngò gi, Romaq myuq má é bang nungmoq lé le, haû gabú danglù gyai yhang hko kyo nau nyi é nghut lhê.

16 Haû gabú danglù hkyô má, ngò gi, a hoq é nghut lhê; hkâsu mù gâ le, haû gi, sâng-hi má Yudaq byu pé, hau htâng tûngbaù pé má, lumjínq é sù yuq hkangmó lé hkyi yu é wó hui nhâng râ nghut é, Garai Gasâng é hpungwup a-tsam nghut lhê.

17 Hkâsu mù gâ le, lumjínq myit mai wó yû luî, lumjínq myit má gîng nyi é, Garai Gasâng chyáng mâ é dîngmán hkyô lé gi, gabú danglù haû má hpông shit bê nghut ri. Haû gi, "Haû dîngmán sù gi, lumjínq myit mai asak duì râ nghut lhê." ✧ ga kâ tô é eq rajung za nghut ri.

*Xângzo Byu Pê Htoq Má Garai Nhkmo-yô É Hkyô*

18 Haû tengmán hkyô lé, yhumsing é agè ashop hkyo eq zik hkûm pyâm é byu pê é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri.

19 Haî mù gâ le, Garai Gasang gi, Yhang eq sêng é hkyô, yhangmoq lé san za tûn shit bê nghut é yan-mai, Garai Gasang lé sé âng é hkyô gi, yhangmoq chyáng san za dut bê nghut ri.

20 Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaî é myit sâmlai lé gi, san za wó myâng, wó sê gyô é nghut lhê. Haû mù luî, byu pé gi, mara mai wó he lut râ hkyô a joq lo nghut ri.

21 Haî mù gâ le, yhangmoq gi, Garai Gasang lé sê to kôlhang, Yhang lé Garai dông a shigyaú kô é eq, jeju a hkya-on kó nghut ri; yhangmoq myit é hkyô

---

✧ 1:17 Hbk 2:4

pé gi, akôm dut byuq é eq, nhik a gyîng é yhangmoq é myit nhiklhum gi, chut byuq bê nghut ri.

<sup>22</sup> Yhangmoq gi, hpaqchyî bò bang nghut lhê ga kôlhag, a-ngok é bang dut byuq bekô nghut ri.

<sup>23</sup> Haû mù, htên byoq a sê é Garai Gasâng é hpungwup shing kang lé, htên byoq sê é byù zòng, nghoq lhô, dusak lhô eq yê jung dusak lhô pé eq, htaî lhik pyâm bekô nghut ri.

<sup>24</sup> Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyâm bê nghut ri.

<sup>25</sup> Yhangmoq gi, haû Garai Gasâng é tengmán hkyô lé, mhaû é hkyo eq htaî lhik pyâm kômù, hpân Sû lé noqkuq dojaú râ malaî, mhaú hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

<sup>26</sup> Haû nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyâm bê nghut ri. Yhangmoq é myiwe wui lháng gi, htûng akying lé tô pyâm kômù, haû eq shai é dông htaî lhik pyâm nyi akô nghut ri.

<sup>27</sup> Haû eq rajung za, yuqgè wui le, myiwe wui eq zum é htûng akying lé tô pyâm kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluî, yhangmoq kut shut é eq gingdán é yubak dam lé, yhumsing gûng yhumsîng hkam yù nyi bekô nghut ri.

<sup>28</sup> Hau htoq agó, haû Garai Gasang lé sê é hkyô

gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyâm é nghut lhê.

<sup>29</sup> Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhûm é hkyô pé byíng jup tô é bang dut bekô nghut ri; manon é, byù sat é, mabyoq jishûm htoq é, mhaú zô é eq myit goí bo é pé le byíng bum ri.

<sup>30</sup> Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbûn é bang, gyáng é bang, agè ashop kut râ hkyô lhoq htoq é bang, mó wui é jino a gyô é bang nghut akô.

<sup>31</sup> Yhangmoq gi, a gyíng a hâng é bang, gidiq a zung é bang, chyt myit a bo é bang, shogyo nhikmyin a sê é bang nghut akô.

<sup>32</sup> Haú pé lé kut é bang gi, shî gíng lhê gâ é, Garai Gasâng é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

## 2

### *Garai Gasang Tarâ Jéyáng É Hkyô*

<sup>1</sup> Haú mù luí, góyuq lé tarâ jéyáng é sù nàng ê, nàng gi, mara mai wó he lut râ hkyô a joq lo; hkâsu mù gâ le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkûn, náng gûng nàng mara byi nyi bê nghut ri.

<sup>2</sup> Haú dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê.

<sup>3</sup> Haû mù, byù za nghut to luî, góbang lé gi, jéyáng mù, yhumsîng gi, haû dông roq châng kut nyi é sù nàng ê, nàng gi, Garai Gasâng é tarâ jéyáng hkyô mai wó hpang lut râ su ngam nyi lhê lhú?

<sup>4</sup> Haû a nghut jáng, nàng gi, Garai Gasâng é ge é hkyo eq nang lé myit wó shuí lhîng nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lhú?

<sup>5</sup> Nghut kôlhang, náng é myit htân hkyô eq myit a lhîng é nhiklhûm é yanmai, haû Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyi má hkâm zo râ nhikmo-yo hkyô lé, yhumsing gùng yhang hkong tô nyi bê nghut ri.

<sup>6</sup> Garai Gasang gi, yuq hkanqmó lé, ó le ó kut é má cháng luî, hkâm zo nhâng râ nghut lhê.

<sup>7</sup> Jân shirâng mù, ge é hkyô kut nyi é dông, hpungwup shingkanq lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi râ nghut lhê.

<sup>8</sup> Nghut kôlhang, haû yhumsing wuízat hkyô za hô luî, tengmán hkyô lé he-ngik pyâm mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê.

<sup>9</sup> Wuîhke hkyô eq iyon yon hkyô gi, agè ashop kut é xângzo byù yuq hkanqmó chyáng jé râ nghut lhê; sâng-hi má Yudaq byu pê chyáng jé mù, tûngbaù pê chyáng le jé râ nghut lhê.

<sup>10</sup> Nghut kôlhang, hpungwup shingkanq, aróng eq nguingón hkyô gi, haû ge é hkyô kut é bang yuq hkanqmó chyáng jé râ nghut lhê: sâng-hi má Yudaq

byu pê chyáng jé mù, tungbaù pê chyáng le jé râ nghut lhê.

<sup>11</sup> Hkâsu mù gà le, Garai Gasang gi, myoqdong a hkyin é Sû nghut lhê.

<sup>12</sup> Haù jep é tarâ lé a sê é mara kut shut é bang lhunglháng gi, jep é tarâ dông a nghut é za htên byoq kó râ nghut lhê. Haù jep é tarâ hkaù má mara kut shut é bang lhunglháng gi, jep é tarâ dông jéyáng é hui zo kó râ nghut lhê.\*

<sup>13</sup> Hkâsu mù gà le, haù jep é tarâ lé wó gyô é bang lé, Garai Gasang é hí má dngmán bang gà é a nghut é za, jep é tarâ lé châng kut é bang za sheq, dngmán bang gà é hui râ nghut lhê.

<sup>14</sup> Haù jep é tarâ lé a wó é tungbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôhang, yhumsing gung yhumsing é matú tarâ dut bekô nghut ri.

<sup>15</sup> Yhangmoq gi, haù jep é tarâ hkyô pé lé, yhangmoq é i-myt unghkaù má kê to bê nghut é lé, tân shit bekô nghut mù, yhangmoq é myit má hkâm zô é hkyô le, haù lé saksé hkâm byi nyi é eq, yhangmoq myit é hkyô gi, ahkuî mara hun kat, ahkuî mara hkyut kat kut nyi ri.

<sup>16</sup> Haù hkyô gi, ngò taí pyo é gabú danglù eq rajung za, byu pê é zaú nghop tô é hkyô pé lé, Hkrisduq Yesuq dông mai Garai Gasang eq tarâ jéyáng é buinyi má dut râ nghut lhê.

### *Yudaq Byu Pé Eq Jep É Tarâ*

---

\* **2:12** Haù jep é tarâ lé a sê bang gà é gi, tungbaù pé lé gà é nghut lui, haù jep é tarâ hkaù má é bang gà é gi, Yudaq byu pé lé gà é nghut lhê.

17 Nghut kôlhang, nàng gi, náng gûng nàng Yudaq byù rayuq nghut lhê ga mù, haù jep é tarâ lé lumhkau nyi é eq Garai Gasang lé xoq é hkyô má nghutbûn nyi é sù;

18 Yhâng ô nau é hkyô lé sê é eq haù jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù;

19 haù jep é tarâ má, hpaqchyî eq tengmán hkyo é alik wó sù nghut é yanmai, haù myoqjit bâng é matú hkyô-u shê sù eq mauchut hkaù mã é bâng é matú maubó nghut sù;

20 byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi,

21 nàng, góbang lé mhoq byi sù nhîng, yhumsing gùng yhumsîng a mhoq yû lú? A wó hkau ga hko táí luí nhîng, nàng gi, hkaù lhê a nghut lú?

22 Su-myi sulàng lú hkyô a wó kut ga byu pé lé táí luí nhîng, nàng gi, su-myi sulàng lú hkyô kut lhê a nghut lú? Hparà lhô lé a jú dik sù nàng gi, noqkuq yhûm lé hpyoq zo hpyoq shuq nyi lhê a nghut lú?

23 Jep é tarâ eq séng luí nghutbun sù nàng gi, haù jep é tarâ lé lu lai é dông, Garai Gasang lé a hkungga kut lhê a nghut lú?

24 Haù gi, "Garai Gasâng é myîng gi, nungmoq é yanmai, tûngbaù pê chyáng lhoq hpoí pyâm é huí ri."\* ga kê tô é eq rajung za nghut ri.

25 Haù jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu lai é nghut jáng, a hpyit é eq rajung za dut bê nghut ri.

---

\* 2:24 Esai 52:5



<sup>26</sup> Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang đông ge són byi lhê a nghut kó lú?

<sup>27</sup> Kâ tô é tarâ lé wó mù, ahpyo-kuq hpyit hkam to gù nghut é, tarâ lu laí é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hùn rã nghut lhê.

<sup>28</sup> Hkâsu mù gâ le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut.

<sup>29</sup> Ahte myit hkaû má Yudaq byù nghut sù za, Yudaq byù kyîng nghut lhê. Kâ tô é tarâ đông a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyîng nghut bê. Haú yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

### 3

#### *Garaí É Lhumzui Hkyô*

<sup>1</sup> Haú đông ga jang, Yudaq byù rayuq dut nyi é gi, hai akyû hkâm zo rã lú? Ahpyo-kuq hpyit hkyô gi, hai akyû bò rã lú?

<sup>2</sup> Hkyô hkgámó má gyai akyû bò lhê! Je hí má gi, haú Garai Gasâng é mungdang lé yhang, yhangmoq lé ap byi bê nghut ri.

<sup>3</sup> Yhangmoq mâ é ra-am lumjîng myit a bo é nghut le gi, hkâsu kó lú? Yhangmoq lumjîng myit a bo é yanmai, Garai Gasâng é lhumzui hkyô lé akyû a bò nhâng wó dut rã lú?

<sup>4</sup> Hká đông le a wó dut!

"Haû mù, nàng dang taí é hkûn, dingmán é hkyô wó lhoq htoq râ eq,  
 nàng jéyáng huí é hkûn, ûng râ nghut lhê."\*  
 ga kê tô é eq rajung za, byù yuq hkangmó gi, byù-mhaú dut kôlhang, Garai Gasang gi, tengmán nyí sháng gaq.

<sup>5</sup> Nghut kôlhang, nga-nhúng é a dingmán hkyô gi, Garai Gasang é dingmán hkyô lé san za je lhoq htoq shit é nghut lhê; haû nghut jáng, nga-nhúng hkâsu nghû taí râ lú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lú? (Ngò gi, byù hkyam dông taí htíng é nghut lhê.)

<sup>6</sup> Ratsuí lhang a nghut! Haû su ru nghut le gi, haû mingkan lé, Garai Gasang hkâsu wó jéyáng râ lú?

<sup>7</sup> Rayuq yuq, "Ngò mhaú é hkyô gi, Garai Gasang tengmán é hkyô lé lhoq ko jat mù, Yhâng é hpung-wup shíngkang lé je wó lhoq hu nhang é nghut le nhíng, haí mù luí, ngò, yubak byù rayuq dông mara byí é hui zô nyí ra shirâ lú?" ga taí dang-rháng râ nghut lhê.

<sup>8</sup> "Ge é hkyô htoq sháng gaq, nga-nhúng, agè ashop hkyô kut sháng." nghû haí mù a taí kê é lú? Dang haû lé ngamoq taí é nghut lhê ga luí, ngamoq lé lumù gansang é dông byù ra-am taí akô. Haú bang gi, mara dam byí é hui zo gíng bang nghut akô.

### *Dingmán Byù A Nyi*

<sup>9</sup> Haû jáng, hkâsu nghû lo râ lú? Nga-nhúng gi, je gè bang nghut lhê lú? Ratsuí lhang a nghut. Yudaq byù nghut nghut, tûngbaù pé nghut nghut,

---

\* 3:4 Hkya-on 51:4

yubak mara hkaû mâ é bang chyat nghut lhê nghû,  
ngamoq taî san kyô wú bê nghut lhê.

<sup>10</sup> Chyúmdang má kâ tô é le,

"Dingmán é byù a nyì, rayuq lháng a nyì nghut ri;

<sup>11</sup> Sê gyô é byù rayuq le a nyì, Garai Gasang lé ho é  
byù le a nyì nghut ri;

<sup>12</sup> Lhunglháng bang gi, lhing ló byuq bekô; yhang-  
moq gi, hpau a dap bang chyat dut byuq  
bekô nghut ri.

Ge é kut sù ó a nyì, rayuq lháng a nyì nghut ri."✧  
gâ ri.

<sup>13</sup> "Yhangmoq é hkyung gi, hpông tô é lup pé nghut  
akô; yhangmoq é shô gi, mhaû akô."✧

"Yhangmoq é nhutwuî pé má gi, shîduq bò lhang-  
muì é duq dap bum ri."✧

gâ tô ri.

<sup>14</sup> "Yhangmoq é nhut pé gi, nhing myíng nhing htê  
eq myit nò danghko baú byíng zan tô ri."✧

gâ tô ri.

<sup>15</sup> "Yhangmoq é hkyî pé gi, byù sat sui lhoq htoq râ  
matú, lawán nau akô;

<sup>16</sup> Yhangmoq sô nyi é hkyô pé gi, htên byoq é eq  
wuîhkê é ahkô tông tô é nghut mù,

<sup>17</sup> nguínón é hkyô lé gi, yhangmoq a sé kó  
nghut ri."✧

gâ tô ri.

<sup>18</sup> "Yhangmoq é myoq hí má Garai Gasang lé gyuq  
hkgngâ é hkyô, a bò kó nghut ri."✧

gâ tô ri.

---

✧ 3:12 Hkya-on 14:1-3 ✧ 3:13 Hkya-on 5:9 ✧ 3:13 Hkya-on  
140:3 ✧ 3:14 Hkya-on 10:7 ✧ 3:17 Esai 59:7-8 ✧ 3:18 Hkya-on  
36:1

19 Byù yuq hkanmó é nhut gi, tû tái jang a joq dut byuq mù, mingkan gón gi, Garai Gasâng é hí má mara bo é bang dut nyì sháng gaq ga, haù jep é tarâ má tái é lhungháng gi, jep é tarâ ô má nyi é bang lé tái é nghut é hkyô lé, nga-nhúng sê lhê.

20 Haù mù luì, jep é tarâ lé châng é đông mai, ó yuq le, Yhâng é hí má dingmán sù gâ é wó hui râ a nghut; jep é tarâ đông gi, yubak mara bo é hkyô lé wó sê yu é za nghut lhê.

### *Lumjínq Jánq, Dingmán Sù Wó Dut É Hkyô*

21 Ahkuì kúm gi, jep é tarâ đông a nghut é za, haù jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri.

22 Garai Gasâng chyáng mâ é dingmán hkyô haù gi, Yesuq Hkrisduq lé lumjínq é đông mai nghut mù, lumjínq bang banshoq htoq má jé é nghut lhê. Gamhkuì é hkyô a joq.

23 Hkâsu mù gâ le, lhunghâng bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri.

24 Ahkuì kúm gi, Hkrisduq Yesuq mai lo é hkyi yù hkyô đông, Garai Gasâng é jejû eq, mara hkyut san byí é laí laí wó hui bê nghut ri.

25 Garai Gasang gi, Yesuq é sui lé lumjínq bâng matú, shíhtái gunglik hkungga ralhum đông, Yesuq lé byí pyám bê nghut ri. Haù gi, laí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tûn shit é nghut ri.

26 Garai Gasang haû su kut é gi, Yhânggùng yhang dîngmán Sû nghut é eq, Yesuq lé lumjîng é sù lé mara hkyut san byî é Sû nghut râ matú, ahkuî lhê ipyat má, Yhâng é tengmán hkyô lé shit byî é nghut lhê.

27 Haû su nghut jáng, nghutbun jowò joq ri lhú? A joq. Hai tarâ mai a joq dut byuq é lhú? Haû jep é tarâ châng é yanmai nghut lhê lhú? A nghut, lumjîng hkyo é yanmai sheq a joq dut byuq é nghut lhê.

28 Hkâsu mù gâ le, byù gi, haû jep é tarâ châng é dông a nghut é za, lumjîng luî, mara hkyut san byi huî é hkyô lé, ngamoq lum nyi lhê.

29 Garai Gasang gi, Yudaq byu pê é Garai Gasang za nghut lhê lhú? Tûngbaù pê é Garai Gasang le a nghut lhú? Nghut lhê, tûngbaù pê é Garai Gasang le nghut lhê.

30 Hkâsu mù gâ le, Garai Gasang gi, rayuq za nghut é yanmai, rajung za lumjîng luî, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê.

31 Haû nghut jáng, nga-nhúng gi, lumjîng myit hau èq, jep é tarâ lé lhoq hpoî pyám râ lhú? Ratsuí lháng a nghut! Nga-nhúng gi, jep é tarâ haû lé lhoq ging tîng é bang ru nghut lhê.

## 4

### *Abraham, Mara Hkyut San Huî É Hkyô*

1 Haû su nghut jáng, nga-nhúng é îchyí îwa Abraham gi, haú hkyô mai haî wó sê yu ri nghû, táí râ lhú?

<sup>2</sup> Abraham gi, zui saî é dông mai, mara hkyut san byi huî é ru nghut le gi, yhang nghutbun jang joq rá nghut lhê; nghut kôlhang, Garai Gasâng é hí má gi, yhang haú dông a nghut.

<sup>3</sup> Chyúmdang má hkâsu gâ tô ri lhú gâ le, "Abraham gi, Garai Gasang lé lumjǐng bê nghut mù, yhang lé, dingmán sũ ga són byi bê nghut ri."✧ gâ ri.

<sup>4</sup> Zui saî é sũ gi, yhâng é zuihpau lé, chyunghuq dông wó yu é a nghut é za, wó yũ gǐng luí, wó yu é ru nghut lhê.

<sup>5</sup> Nghut kôlhang, zui saî é hkyô dông a nghut é za, haú agè ashop hkyô lé mara hkyut san byi é Garai Gasang lé lumhkau é sũ gi, yhâng é lumjǐng myit é yanmai, dingmán sũ ga són byi huî é nghut lhê.

<sup>6</sup> Haú eq rajung za, yhang zui saî é hkyô dông a nghut é za, Garai Gasâng eq dingmán sũ ga són byi huî é, Garai Gasâng chyáng mã é shimân jeju wó é sũ eq séng luí, Dawiq taî é gi,

<sup>7</sup> "Tarâ lu laî é lé mara hkyut pyám byi huî é eq yubak mara lé nghop pyám byi huî é bang gi, hkungsô wó nyi ri.

<sup>8</sup> Bo tô é mara lé, Yhumsing èq mara a són byi é hui sũ gi, hkungsô wó nyi ri."✧

gâ ri.

<sup>9</sup> Haú sũ é jeju gi, ahpyo-kuq hpyit hkâm bâng é matú za nghut lhê lhú? Ahpyo-kuq a hpyit bâng é matú le nghut lhê lhú? Hkâsu mù gâ le, Abraham é lumjǐng myit lé, dingmán sũ ga són byi bê nghut lhê nghũ, ngamoq taî nyi bê nghut lhê.

<sup>10</sup> Haû su són byî é gi, hkâ-nhám nghut lhê lú? Ahpyo-kuq hpyit hkâm é htâng má lú? A nghut jáng, hí má lú? Haû gi, ahpyo-kuq hpyit hkâm é htâng má a nghut é za, hí má ru nghut lhê.

<sup>11</sup> Hau htoq agó, Abraham gi, yhang, ahpyo-kuq hpyit a hkam yù shî é hkûn mai, lumjínng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlhang, lumjínng é lhunglhang bang lé dingmán bang ga són byî é wó hui râ matú, haû bâng é îwa dut bê nghut ri.

<sup>12</sup> Haû ahpyo-kuq hpyit hkâm é za a nghut, nga-nhûng é îwa Abraham, ahpyo-kuq hpyit a hkam yù shî má wó é lumjínng hkyô é hkyî-kám lé cháng luí ahpyo-kuq hpyit bâng é îwa le, yhang nghut ri.

<sup>13</sup> Mingkân é amyû hkûng xoq pé dut râ ga, Abraham eq yhang é awut ashín pé lé byi tô é danggidiq gi, jep é tara é yanmai a nghut é za, lumjínng hkyô mai lo é dingmán hkyô dông ru nghut lhê.

<sup>14</sup> Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjínng hkyô gi, akyû a bo é eq, danggidiq gi, hpau a dap é dut byuq lhê.

<sup>15</sup> Haû jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

<sup>16</sup> Haû mù luí, danggidiq gi, Abraham é awut ashín lhunglhang bâng chyáng, jeju mai za lo é eq gingtíng nyi é dut sháng gaq ga, lumjínng hkyô mai lo é nghut lhê. Haû gi, jep é tarâ má lòm bâng é matú baú za a nghut, Abraham é lumjínng hkyô má

lòm bâng é matú le nghut lhê. Abraham gi, nga-nhúng lunglhâng bâng é îwa nghut ri.

17 "Ngò gi, nang lé, byù myù myo myô é îwa dut nhâng bê." ✧ ga kê tô é eq rajung za, haû shi byuq bê bang lé wó lhoq dui é eq a joq wú é zè lé joq shoq wó kut é, yhang lumjínq é sù Garai Gasâng hí má, Abraham gi, nga-nhúng é îwa nghut lhê.

18 "Náng é awut ashín pé le, haû eq rajung za myô lò râ nghut lhê." ✧ ga yhang lé taí kyô to bê eq rajung za, yhang gi, myit myoqbyù jowò haî a joq kôlhang, lumjínq luî myoqbyu nyi é nghut mù, byù myù myo myô é îwa dut bê nghut ri.

19 Yhang gi, rashô zàn kô jé byuq bê nghut mù, yhânggùng gi, shi é gyá dut é hui zô é eq Sarah é zoyhùm shibó le shum byuq kôlhang, yhang gi, lumjínq myit a yom byuq nghut ri.

20 Hau htoq agó, Garai Gasâng é danggidiq eq séng luî, a lumjínq a dut é eq hê myit mhô myit a dut é za, yhâng é lumjínq myit lé saî lhoq ging títq mù, Garai Gasang lé hkya-on kungtôn luî,

21 Garai Gasang gi, Yhang byî tô é danggidiq eq rajung za wó kut râ a-tsam bò sù nghut é lé, yhang myit zing nyi ri.

22 Hau é yanmai, "Yhang lé, dingmán sù ga sôn byi bê nghut ri." ✧ gâ tô é nghut lhê.

23 "Yhang lé, sôn byi bê." ga, kê tô é dang gi, yhang é matú za a nghut,

24 nga-nhúng é Yhumsîng Yesuq lé, shi é mai lhoq dui toq yû sù Garai Gasang lé lumjínq luî, Yhang èq dingmán bang ga sôn byi râ nghut é, nga-nhúng é matú le nghut lhê.



<sup>25</sup> Yhumsîng Yesuq gi, nga-nhúng é yubak marâ é matú, shî hkám byi râ dông ap pyâm é hui luî, nga-nhúng, mara hkyut san byí é hui râ matú, lhoq dui toq é hui bê nghut ri.

## 5

### *Nguingón Hkyô Eq Gabú Hkyô*

<sup>1</sup> Haû mù luî, nga-nhúng gi, lumjîng é dông mai mara hkyut san byí é hui bê nghut é yanmai, nga-nhúng é Yhumsîng Yesuq Hkrisduq dông, Garai Gasang eq buinùm wó xoq yû bê nghut lâ.

<sup>2</sup> Yesuq é yanmai, nga-nhúng gi, ahkuî wó yu to bê jeju shî má, lumjîng luî wó wâng bê nghut mù, Garai Gasâng é hpungwup shingkan lé myoqbyù luî gabú gumrong nyi lâ.

<sup>3</sup> Haû za a nghut, nga-nhúng gi, wuîhke jamjau hkyô pé má le gabú gumrong nyi lâ. Hkâsu mù gâ le, wuîhke jamjau hkyô gi, hkam jan hkyô lhoq htoq ri;

<sup>4</sup> hkam jan hkyô gi, myit a-tsam lhoq htoq lâ; myit a-tsam gi, myoqbyu to hkyô lhoq htoq é lé, nga-nhúng sê lâ.

<sup>5</sup> Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chytđap myit lé, Yhang mai, nga-nhúng lé byí tô é Chyoiyúng Woi-nyí dông, nga-nhúng é i-myit unghkaû má hut kat byi bê nghut ri.

<sup>6</sup> Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkám byi bê nghut ri.

<sup>7</sup> Gè gè ga jáng, dingmán su é matú shî hkám byi râ byù gi, shau râ nghut lhê; nghut kôlhang, byù gè rayuq é matú kúm gi, wám shî hkâm é byù nyi sê lhê.

<sup>8</sup> Nghut kôlhang, nga-nhúng gi, yubak dap bang nghut nyi ashî hkûn, nga-nhúng é matú Hkrisduq shî hkám byi é má, Garai Gasang gi, Yhâng é chyt-dap myit, nga-nhúng lé shit byi bê nghut ri.

<sup>9</sup> Nga-nhúng gi, ahkuî, Yhâng é sui mai mara hkyut san byi é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lhê.

<sup>10</sup> Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byi é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lhê.

<sup>11</sup> Haû su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuî wó yu to bê nghut mù, Yhâng é yanmai, Garai Gasang má le, gabú gumrong nyi lhê.

*Shi É Gi, Adam É Yanmai, Dui É Asak Gi, Hkrisduq É Yanmai*

<sup>12</sup> Byù rayuq dông mai, yubak mara gi, mingkan má jé wâng bê nghut lui, shî-nò hkyô gi, yubak marâ é yanmai châng jé bê nghut ri; haû dông mai, byù lhunglhang bang gi, yubak dap bang chyat nghut byuq mù, shî-nò hkyô gi, byù lhunglhang bâng chyáng jé bê nghut ri.

13 Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lhê.

14 Haû su ga kôlhang, Adam su hkunmó lé lu lai é dông mara a kut shut bâng é ahtoq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

15 Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung!

16 Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byî é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê.

17 Hau htoq agó, byù rayuq tarâ lu lai luî, haû rayuq é yanmai, shî-nò hkyô up nyi bê nghut lhê, ahkuí kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duì hkyô má uphkanq nyi kó râ nghut lhê.

18 Haû mù luî, tarâ lu lai é hkyô ralhûm é yanmai, byù lhunghâng bang gi, mara dam byî é hui

zo kô é su, dingmán hkyo é muzó ralhûm é yanmai, byù lunglhâng bang gi, asak duì hkyô eq sêng é mara hkyut san byi hkyô lé wó bê nghut ri.

<sup>19</sup> Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é huì kó râ nghut lhê.

<sup>20</sup> Haû jep é tarâ jat é gi, tarâ lu lai hkyô je myo râ matú nghut lhê. Nghut kôlhâng, yubak mara myô jat é hkûn, jeju gi, je riyhâng myô jat lo é nghut lhê.

<sup>21</sup> Haû mù, yubak mara gi, shî-nò hkyô dông uphkâng bê su, jeju gi, nga-nhúng é Yhumsíng Yesuq Hkrisduq é yanmai, ahtum abyuq é asak wó byî é dingmán hkyô dông up râ nghut lhê.

## 6

### *Hkrisduq Eq Rading Ralhum*

<sup>1</sup> Haû nghut jáng, nga-nhúng gi, hkâsu nghû tái râ lú? Jeju myô jat lò sháng gaq nghû, nga-nhúng, yubak mara kut xoq nyì râ lú?

<sup>2</sup> Haû su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haú má wó dui nyi lo râ lú?

<sup>3</sup> Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkâm hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lú?

<sup>4</sup> Haû mù luí, Hkrisduq gi, Íwâ é hpungwup shingkâng èq, shî bê mai lhoq dui toq huí é su, nga-nhúng le, asak asik dông wó dui nyì sháng gaq nghû, nga-nhúng gi, wui-myhup hkâm é dông,

Yhang eq rahá, shî hkâm é eq myhup yhum é hui bê nghut lê.

<sup>5</sup> Nga-nhúng gi, Yhang shî hkám é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut râ nghut lê.

<sup>6-7</sup> Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lê.

<sup>8</sup> Haû mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi râ nghut lê nghû, lumjíng lê.

<sup>9</sup> Hkâsu mù gâ le, Hkrisduq gi, shî bê mai lhoq dui toq é hui bê nghut mù, Yhang gi, dum wó shi lo râ a nghut é lé, nga-nhúng sê lê; shî-nò hkyô gi, Yhang lé hkâ-nhám le wó sing to râ a nghut lo.

<sup>10</sup> Yhang shî hkâm é shî-nò hkyô gi, banshoq bâng é matú, yubak mara eq séng luí radàm za shî hkám byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lê.

<sup>11</sup> Haû eq rajung za, nungmoq gi, yubak mara eq shi gang luí, Hkrisduq Yesuq đông Garai Gasâng é matú asak dui nyi lê nghû, sôn yù keq.

<sup>12</sup> Haû mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê.

<sup>13</sup> Nungmoq é gungdu showui showang pé lé, agè ashop hkyo é chùng zè pé đông yubak mara

má hkâ-ap byî pyám kó, shî bê mai lhoq dui toq yû huî é bang su, yhumsing gùng yhumsîng, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chûng zè pé dông, Garai Gasâng chyáng ap byi keq.

<sup>14</sup> Hkâsu mù gâ le, nungmoq gi, jep é tarâ hkaû má a nghut lô é za, jeju hkaû má nghut nyî bekô yanmai, yubak mara gi, nungmoq lé sîng sû wó dut râ a nghut lo.

### *Dingmán Hkyo É Jùn Pé*

<sup>15</sup> Haû jáng gi, hkâsu kó lú? Nga-nhúng gi, jep é tarâ hkaû má a nghut lo é za, jeju hkaû má nghut nyî bekô yanmai, mara wó kut shut kó râ lú? Haû su a wó kut!

<sup>16</sup> Nungmoq gi, rayuq yuq é jìno gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak marâ é jùn dông nghut kôlhang, dingmán hkyô wó râ nghut é jìno gyo hkyô nghut kôlhang, nungmoq châng nyi é nghut le gi, nungmoq, haû é jùn dut bê lé, a sé kó lú?

<sup>17</sup> Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklhum banshoq èq cháng bekô nghut é yanmai, Garai Gasang lé jeju hkya-on sháng.

<sup>18</sup> Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

<sup>19</sup> Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè

ashop hkyô myô jat nhang é má jùn dông lhang ap byi wú bekô nghut é su, ahkuí gi, chyoyúng hkyô wó yú râ matú, haú pé lé, dingmán hkyô má jùn dông ap byi keq.

<sup>20</sup> Nungmoq gi, yubak marâ é jùn dut nyi kô é hkûn, dingmán hkyo èq uphkanq é mai lut nyi kô é nghut lhê.

<sup>21</sup> Ahkuí, nungmoq hoqjung nghû wú htoq é pé gi, haú u lé, hai akyû wó yú kô é lhú? Hau pé gi, shi byuq é má htûm é chyat nghut ri.

<sup>22</sup> Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasâng é jùn dut bekô nghut ri; hau é akyû gi, chyoyúng hkyô wó yu é nghut mù, ahtum abyuq é asak wó râ nghut lhê.

<sup>23</sup> Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasâng é chyunghuq gi, nga-nhûng é Yhumsîng Hkrisduq Yesuq é yanmai, ahtum abyuq é asak nghut ri.

## 7

### *Tarâ Mai Lut É Hkyô*

<sup>1</sup> Gumang wui ê, ngò gi, tarâ lé sê é bang nungmoq lé tai nyi lhê: haú tarâ gi, byù rayuq lé, yhang, asak dui nyi é u lé za wó uphkanq é lé, nungmoq a sé kó lhú?

<sup>2</sup> Dangké, ikun wàng bê myiwe myhí rayuq gi, yhâng é yhumsîng hpó asak dui nyi é ahkyíng má, tarâ èq up zing tô é hui ri; nghut kôlhang, yhâng é yhumsîng hpó shi byuq é nghut jáng gi, haú ikun wàng tarâ mai, yhang wó lut bê nghut ri.

<sup>3</sup> Haû nghut é yanmai, yhang é yhumsîng hpó asak dui nyi ashî u lé, yuqgè góyuq eq hâng lhum é nghut jáng gi, yhang lé, sulàng lú sú ga kó râ nghut lhê. Nghut kôlhang, yhang é yhumsîng hpó shi byuq é nghut jáng gi, yhang, tarâ haû mai lut bê nghut luî, yuqgè góyuq eq hâng lhum kôlhang, sulàng lú sô a nghut lo.

<sup>4</sup> Haû mù luî, ngá é gumang wuî ê, nungmoq le, haû shi byuq é mai lhoq dui toq yù hui bê sô Yuqgè chyáng wó xoq mù, nga-nhung gi, Garai Gasang lé ashi wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê.

<sup>5</sup> Hkâsu mù gâ le, nga-nhung, yubak gungsho má nghut nyi é hkûn, nga-nhung gi, shî-nò hkyo é ashi zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhung é gungdu pé má mù zui nyi é nghut lhê.

<sup>6</sup> Nghut kôlhang, ahkuî gi, nga-nhung lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhung dojaú nyi é nghut lhê.

### *Jep É Tarâ Eq Yubak Mara*

<sup>7</sup> Haû jáng, nga-nhung hkâsu tái râ lhu? Jep é tarâ gi, yubak mara nghut lhê lhu? Ratsuí lhang a nghut! Gè gè ga jáng, haû jep é tarâ dông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"✧ ga jep é tarâ má a tái tô é nghut jáng, myoqnoq é hkyô lé, ngò sé râ a nghut.

---

✧ 7:7 Htoq Ló 20:17



8 Nghut kôlhang, yubak mara gi, hkunmó é ahkáng lé chûng mù, ngò má myoqnoq hkyô jung hkangmó lhoq htoq byî ri; hkâsu mù gâ le, jep é tarâ hkaû má a nghut jáng, yubak mara gi, shi é za nghut lê.

9 Ngò gi, tarâ hkaû má a nghut é za asak dui wú bê nghut lê; nghut kôlhang, haû hkunmó htoq lô jáng, yubak mara gi, dui lò mù, ngò gi, shi bê nghut lê.

10 Haû mù luî, asak dui nhâng râ matú nghut é hkunmó haû gi, shi-nò hkyô dut byuq é lé, ngò wó sê é nghut lê.

11 Hkâsu mù gâ le, yubak mara gi, hkunmó é ahkáng lé chûng mù, ngo lé mhaû yù luî, hau èq ngo lé shi nhang ri.

12 Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dingmán é eq ge é nghut ri.

13 Haû nghut jáng, ge é hkyô haû gi, ngá é matú shi-nò hkyô dut byuq bê lú? Haû dông a nghut! Nghut kôlhang, yubak mara lé gi, yubak mara dông hkyak wó lhoq htoq shit râ matú, haû ge é hkyô dông mai, yubak mara gi, ngò má shi-nò hkyô lhoq htoq bê nghut luî, yubak mara gi, gè gè yhang agè ashop dut é lé, hkunmó dông mai tân shit é nghut lê.

14 Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lê; nghut kôlhang, ngò má gi, gungsho eq sêng é hkyô za bo é nghut luî, yubak mara má jùn dông ung zô é hui bê nghut lê.

15 Ngò haî kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é

hkyô lé kut é yanmai nghut lhê.

<sup>16</sup> Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê.

<sup>17</sup> Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê.

<sup>18</sup> Ngò má, nghut bê, ngá é yubak gungsho má ge é hkyô haî le a bo é lé, ngò sê lhê. Hkâsu mù gâ le, ge é hkyô lé kut nau é myit ngò má bò kôlhang, haû lé a wó kut htoq nghut ri.

<sup>19</sup> Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri.

<sup>20</sup> Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

<sup>21</sup> Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri.

<sup>22</sup> Hkâsu mù gâ le, ngò gi, Garai Gasâng é tarâ lé, ngá é i-myit unghkaû má myit nguî gabú nyi lhê.

<sup>23</sup> Nghut kôlhang, ngá é gungdu showui showang pé má bo é gotû tarâ gi, ngá é i-myit tarâ eq majan zân lhûm é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyû dut nhang é lé, ngò myang ri.

<sup>24</sup> Ngò gi, shogyo rayhup dut sù nghut ri-nhung! Shî nhang é gungdu shî mai, ó yuq wá, ngo lé wó hkyi yù rá lhú?

<sup>25</sup> Nga-nhúng é Yhumsîng Yesuq Hkrisduq dông mai wó lut bê nghut mù, Garai Gasang lé jeju hkya-

ôn nyi lhê!

Haû mù luî, ngò yhang, myit é dông gi, Garai Gasâng é tarâ lé châng lhê, nghut kôlhang, yubak gungsho dông gi, yubak é tarâ lé châng lhê.

## 8

### *Haû Woi-nyí Mai Asak Dui É Hkyô*

<sup>1</sup> Haû mù luî, ahkuî, Hkrisduq Yesuq má nghut nyi bâng é matú gi, mara byî é hkyô a joq lô é nghut lhê.

<sup>2</sup> Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq dông, yubak mara eq shî-nò hkyô é tarâ mai, ngo lé lhoq lhut yû bê nghut lhê.

<sup>3</sup> Haû jep é tarâ gi, yubak gungshô é yanmai, wum nyhóm luî a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gunghkyâng dông, Yhang Zo sîng lé nhang kat é dông kut pyám bê nghut ri.

<sup>4</sup> Haû mù, Garai Gasang gi, yubak gungsho dông asak a dui é za Woi-nyí dông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqdân pyám bê nghut ri.

<sup>5</sup> Haû yubak gungsho dông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí dông asak dui é bang kúm gi, Woi-nyí ô nau é hkyô pé lé myit zuq nyi akô nghut ri.

<sup>6</sup> Haû yubak byu é myit gi, shi é hkyô nghut ri; haû Woi-nyí eq hking to huí su é myit kúm gi, asak eq nguínón hkyô nghut ri.

<sup>7</sup> Haû yubak myit gi, Garaî é tarâ ô má a nyi é htoq agó, haû lé a wó cháng kut é yanmai, Garaî é gyè nghut ri.

<sup>8</sup> Haû yubak gungshô èq hkang tô é hui bang gi, Garai Gasang lé a wó gabú nhâng kó nghut ri.

<sup>9</sup> Nghut kôle, Garai Gasâng é Woi-nyí gi, nungmoq chyáng lúng nyi bê nghut jáng, nungmoq gi, haû yubak gungshô èq hkang to huí é bang a nghut lô é za, Woi-nyí èq hkang to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê.

<sup>10</sup> Nghut kôlhang, nàng má Hkrisduq nyi nyi é nghut jáng, náng é gungdu gi, yubak marâ é yanmai shî kôlhang, náng é woi-nyí gi, dingmán hkyo é yanmai dui nyi ri.

<sup>11</sup> Hau htoq agó, Yesuq lé shi é mai lhoq dui toq yû Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yû Sù gi, nungmoq má nyi nyi é, Yhâng é Woi-nyí đông mai, nungmoq é, shî sê é gungdu pé lé le, asak duì nhâng râ nghut lhê.

<sup>12</sup> Haû mù luí, Gumang wuì ê, nga-nhúng gi, yubak gungsho đông asak duì râ matú, wò wó é bang a nghut.

<sup>13</sup> Hkâsu mù gâ le, haû yubak gungsho đông asak duì kô é nghut jáng, nungmoq gi, shî râ nghut lhê; nghut kôlhang, haû gungshô é shut shaî hkyô lé, Woi-nyí èq sat pyám kô é nghut jáng, nungmoq gi, asak duì râ nghut lhê.

<sup>14</sup> Garai Gasâng é Woi-nyí èq shuí u é hui bang gi, Garai Gasâng é yhangzô pé nghut lhê.

<sup>15</sup> Hkâsu mù gâ le, nungmoq gi, gyuq râ matú,

nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,\* Âwa ê" nghû wut é nghut lhê.

<sup>16</sup> Nga-nhúng gi, Garai Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm nyi ri.

<sup>17</sup> Ahkuí, nga-nhúng gi, zo wuî nghut bê yanmai, Hkrisduq eq rahá, Garai Gasâng é amyû hkûngxoq pé wó dut é nghut lhê. Nga-nhúng gi, Hkrisduq é wuîhke jamjau pé lé, gè gè yhang bo hui zô é nghut jáng, Yhâng é hpungwup shing kang lé le, bo myang hkam yù râ nghut lhê.

### *Htàngnùng Lhê É Hpungwup Shing kang*

<sup>18</sup> Nga-nhúng é ahkuí lhê é wuîhke jamjau hkyô pé gi, nga-nhúng lé shit râ nghut é hpungwup shing kang eq whuí râ a gingdán nghû, ngò wó myit ri.

<sup>19</sup> Haû hpan to huí é lhunglhang gi, Garai Gasâng é yhangzô pé lé lhoq htoq shit byí râ lé, gyai yhang myit lánq nyi akô nghut ri.

<sup>20</sup> Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsîng hkyin yu é dông a nghut é za, haû su dut nhâng Sû ô nau é dông kut é nghut ri.

<sup>21</sup> Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luí, Garai Gasâng é yhangzo pê é hpungwup bo é

---

\* **8:15** *Aba* gâ é gi, Aramaik dang dông "âwa" gâ é lichyúm nghut lhê.

luthkyô má wó wâng râ matú, myoqbyu tô é nghut lhê.

<sup>22</sup> Haû hpan to huí é lhunglhang gi, ahkuí hkyíng jé shoq, zohkû-nò no é su nô-kying kyíng nyì kô é lé, nga-nhúng sê lhê.

<sup>23</sup> Haû pé za a nghut, Woi-nyí é sâng-hi ashi† lé wó yû bê bang nga-nhúng le, zo pé đông yín yu é jeju lé lánq uchang, i-myt unghkaû má nô-kying kyíng é nghut lhê. Zo pé đông yín yu é jeju haû gi, nga-nhúng é gungdu hkyi xe yù hkyô nghut lhê.

<sup>24</sup> Hkâsu mù gâ le, nga-nhúng gi, myit myoqbyù hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsíng myang to bê é lé, ó yuq wá myit myoqbyù shirâ lhú?

<sup>25</sup> Nghut kôlhang, nga-nhúng gi, a wó shí é lé myit myoqbyu é nghut jáng, myit hîng hîng kut lánq é nghut lhê.

<sup>26</sup> Haû eq rajung za, Woi-nyí gi, nga-nhúng wum nyhôm é hkyô má garúm byí ri. Nga-nhúng gi, haí dung râ é lé a sé kôlhang, haû Woi-nyí yhang gi, dang mai a wó taí htoq é nô-kying htê đông, nga-nhúng é matú bo dúng xoq byí ri.

<sup>27</sup> Nga-nhúng é i-myt unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é đông, sânyúng bâng é matú bo dúng xoq byí ri.

### *Banshoq Lé Je Wó Ung Pyám Râ Hkyô*

† **8:23** *Woi-nyí é sâng-hi ashi gâ é gi, Woi-nyí gi, Garai Gasang byí é chyunghuq pé mã é sâng-hi lhum nghut lhê.*

28 Garai Gasang gi, Yhang myit sôn tô é eq ra-jung za, ji yù luî, Yhang lé chyitdap bâng é matú, lhunglháng lé ge é dông chyat kut é hkyô lé, nga-nhúng sê lhê.

29 Hkâsu mù gâ le, Yhang Zo gi, gumang wuì myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó púng nhâng râ matú, hí mai masat to bê nghut ri.

30 Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byî ri; mara hkyut san byî é hui bang lé gi, hpungwup shing kang bò nhang ri.

31 Haû jáng gi, shí hkyô eq séng luî, nga-nhúng haî taí shirâ lhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyé wám kut râ lhú?

32 Yhumsing é Yhangzo lé lháng a ha bûn é za, nga-nhúng banshoq bâng é matú ap byî pyâm é Sû gi, Yhang lé le, lhunglháng lé le, rahá laí laí byi râ a nghut lhú?

33 Garai Gasâng èq hkyin yu to bê bang lé, ó yuq wá mara wó hûn râ lhú? Garai Gasang gi, mara hkyut san byi Sû nghut ri.

34 Hkrisduq Yesuq gi, shî hkám luî, shî hkâm é htoq agó, shi é mai lhoq dui toq yu é hui mù, Garai Gasâng é loqyo hkyam má nghut nyî luî, nga-nhúng é matú bo dúng xoq byî nyi bê nghut é yanmai, ó yuq wá mara wó byi râ lhú?

35 Hkrisduq é chyitdap myit mai, nga-nhúng lé, hai eq wá wó lhoq kang râ lhú? Gunjang huî é hkyo èq luq? Wuîhke huî é hkyo èq luq? Zing-ri huî é hkyo èq luq? Mutmó huî é hkyo èq luq?

Gùng chîn dut huî é hkyo èq luq? Gyuq jung èq luq?  
Sham èq luq?

<sup>36</sup> Haû gi,

"Náng é yanmai, ngamoq, nyí wuî sat pyâm é huî  
nyi ri;

sat râ matú nyhi tô é sau pé lé su, ngamoq lé  
myit pyâm akô."☆

ga kê tô é eq rajung za nghut ri.

<sup>37</sup> A wó lhoq kang; nga-nhúng lé chyitdap Su é  
yanmai, nga-nhúng gi, haû pé banshoq lé je wó  
ung pyâm é nghut lhê.

<sup>38</sup> Hkâsu mù gâ le, shî kôlhang, byùn kôlhang, mau-  
mang lagyô pé nghut kôlhang, agè ashop é nat pé  
nghut kôlhang, shí ipyat nghut kôlhang, htang pyat  
nghut kôlhang, haí jung a-tsam pé nghut kôlhang,

<sup>39</sup> htoq tsáng mâ é nghut kôlhang, a-ô tsáng mâ é  
nghut kôlhang, hpan tô é gotû haí nghut kôlhang,  
nga-nhúng é Yhumsîng Hkrisduq Yesuq má bo é  
Garai Gasâng é chyitdap myit mai, nga-nhúng lé  
wó lhoq kang pyám râ a nghut nghû, ngò gi, hkyak  
wó sê yu ri.

## 9

### *Garai Gasang Hkyin Yu É Israelaq Byu Pé*

<sup>1</sup> Ahkuî, ngò gi, Hkrisduq má tengmán é dang tái  
râ; ngò a mhaû é lé, haû Chyoiyúng Woi-nyí gi, ngá  
é unghkaû myit má hkyak saksé hkâm nyi ri.

<sup>2</sup> Ngò gi, ngá é myit nhiklum má, gyai yhang  
yón kuq nyi é eq ayang hpuzô nyi lhê.

☆ 8:36 Hkya-on 44:22



<sup>3</sup> Hkâsu mù gâ le, ngò gi, ngá é byuhú, ngá é gumang wui é matú, nhîng é hui luî Hkrisduq eq gang le lháng gè râ su gâ ri.

<sup>4</sup> Haú bang gi, Israelaq byu pé nghut lhê. Zo yín yû huî é hkyô le, hpungwup shingkang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akò nghut ri.

<sup>5</sup> Haú myîng hû é îchyí îwâ pé gi, yhangmoq é îchyí îwâ pé nghut luî, byu é hkyam dông gon jáng, Hkrisduq gi, yhangmoq amyû mâ é nghut ri. Yhang gi, lhunglháng lé up é, ahtum abyuq hkya-on huî é Garai Gasang nghut ri! Amen.

<sup>6</sup> Haú gi, Garai Gasâng é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byù akying chyat a nghut kó nghut ri.

<sup>7</sup> Abraham é awut ashín banshoq bang gi, yhâng é zo wuî akying chyat nghû a wó taí é nghut lhê. Hau é malaî, "Isak dông mai lo é lé, náng é awut ashín nghû sôn byi râ nghut lhê."\* gâ tô ri.

<sup>8</sup> Radông taí sháng ga jáng, gungsho mai hku é zo wuî gi, Garai Gasâng é zo wuî akying a nghut kó, danggidiq eq sêng é zo wuî za sheq, Abraham é awut ashín pé dông sôn byî é nghut lhê.

<sup>9</sup> Hkâsu mù gâ le, "Masat tô é ahkyíng má, ngò dum taú lé mù, Sarah gi, yuqzo hkú râ nghut lhê."\* ga taí tô é danggidiq é yanmai nghut lhê.

<sup>10</sup> Haú za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê.

---

\* 9:7 Apûn 21:12    \* 9:9 Apûn 18:10,14

11-12 Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gîng nyi sháng gaq ga, haû zozûm nhik a hku lé shî é htoq agó, ge é eq a ge é muzó haî lháng a kut shimá, "Haû ko sù yuq gi, tiq sù yuq lé dojaú râ nghut lhê."✧ ga, Rebeka lé taî kyô tô é nghut lhê.

13 Haû gi, "Yakup lé, ngò chytidap lhê, nghut kôlhang, Eso lé gi, a ngui é nghut lhê."✧ ga kâ tô é eq rajung za nghut ri.

14 Haû nghut é yanmai, nga-nhúng hkâsu ngû taí râ? Garai Gasang gi, a tarâ é sù nghut lhê lú? Ratsuí lháng a nghut!

15 Hkâsu mù gâ le,

"Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê."✧ ga, Mosheq lé Yhang taî ri.

16 Haû mù luî, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasang é shogyo nhikmyin é yanmai za nghut lhê.

17 Hkâsu mù gâ le, Chyúmdang má, "Náng chyáng Ngá é a-tsam wó tân shit râ eq mingkan gón má Ngá é mying lhoq pyo é hui râ matú sheq, Ngò, nang lé lhoq toq kat é nghut lhê."✧ ga, Hpara-uq lé taî ri.

18 Haû mù luî, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

✧ 9:11-12 Apûn 25:32 ✧ 9:13 Mal 1:2-3 ✧ 9:15 Htoq Ló 33:19

✧ 9:17 Htoq Ló 9:16

19 Nungmoq mâ é rayuq yuq, "Haû jáng, Garai Gasang gi, ngamoq lé haî mù mara hun nyi ashî lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé táí kó râ nghut lhê.

20 Nghut kôlhang, Garai Gasang lé dang tu sù byù nàng gi, ó yuq wá nghut lhê lhú? Saî to hui bê é zè pé gi, "Nàng, haî mù ngo lé shî su kut saî tô lhê lhú?" nghû saî é Sù lé wó táí râ lhú?

21 Tso-au saî sù gi, tsohtung ralhum mai za, hkik é tso-au pé eq a hkik é tso-au pé saî râ ahkáng wó lhê a nghut kô lhú?

22 Garai Gasang gi, Yhâng é nhikmo-yo hkyô tân shit luî, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, táí râ jang haî joq ashî lhú?

23 Hpungwup shingkâng é matú noq mai hen to bang nghut é, Yhang shogyo nhikmyin huî é bang lé, Yhâng é agùn agó é hpungwup shingkang lé sé nhâng naù mù, Yhang haû su kut é nghut jáng, táí râ haî joq ashî lhú?

24 Haú bang gi, Yudaq byu pé mai za a nghut, tûngbàu pé mai le ji yù huî é bang nga-nhúng nghut lhê.

25 Haû eq rajung za, Hosea laiká má Yhang taî tô é gi,  
"Ngá é byù myû a nghut é bang lé, 'Ngá é byù myû' nghû;

Ngò a chyit é byizo lé 'Ngò chyit sù' nghû wut râ nghut lhê."<sup>☆</sup>

gâ ri.

26 Haû mù,

---

☆ 9:25 Hos 2:23

"Nungmoq gi, ngá é byù myû pé a nghut.' nghû yhangmoq lé taí é jowò má yhang, yhangmoq gi, 'Rû dui nyi é Garai Gasâng yhangzô pé' ga wut é hui kó râ nghut lê."✧

gâ ri.

<sup>27</sup> Esai-aq le, Israelaq byu pé eq séng luí garu taí é gi,

"Israelaq yhangzo yhangshû pé gi, wuìshuq lung-aû yàm mâ é semuî su myo kôhang, myit gyó tô é bang za sheq hkyi yu é hui kó râ nghut lê.

<sup>28</sup> Hkâsu mù gâ le, haû Yhumsîng gi, myidàm htoq má Yhâng é tarâ jéyáng hkyô lé hân hân lhoq dik lhoq htûm pyám râ nghut lê."✧

gâ ri.

<sup>29</sup> Haû eq rajung za, hí lé Esai-aq taí tô é gi, "A-tsam dik shoq bò sù haû Yhumsîng za, nga-nhúng lé, awut ashín a myhit to byî é nghut jáng,

nga-nhúng gi, Sodom wà su dut byuq luí, Gomoraq myuq eq pung byuq râ nghut lê."✧

gâ ri.

### *Israelaq Byu Pé A Lumjîng Kô É Hkyô*

<sup>30</sup> Haû mù, nga-nhúng hkâsu nghû taí râ l hú? Dingmán hkyô lé a châng hkat é tûngbaù pé gi, haú lé wó yù bekô; haû gi, lumjîng hkyo é yanmai wó yu é dingmán hkyô nghut ri.

<sup>31</sup> Nghut kôhang, tarâ eq sêng é dingmán hkyô lé châng hkat é Israelaq byu pé gi, haú lé a wó yù kó nghut ri.

<sup>32</sup> Haî mù a wó yû kô é lúh? Yhangmoq gi, lumjínq myit èq châng hkat kô é a nghut é za, muzó pé èq châng hkat kô é yanmai, a wó yû kô é nghut ri. Yhangmoq gi, "htung htê râ luqgok" má htûng leng bekô nghut ri.

<sup>33</sup> Haû,

"Wú keq, htûng leng râ luqgok eq myit leqbat nhâng râ luqmó cham lé, Ngò, Zi-un bùm má lheq to lui,

Yhang lé lumhkaû sù gi, hkâ-nhám le hoq hpu é hui râ a nghut."✧

ga kê tô é eq rajung za nghut ri.

## 10

<sup>1</sup> Gumang wuì ê, ngò gi, haû Israelaq byu pé hkyi yu é hui kó sháng gaq nghû, gyai yhang myit shirông lui, Garai Gasâng chyáng yhangmoq é matú kyûdung byi nyi lhê.

<sup>2</sup> Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyî bo é dông a nghut kó.

<sup>3</sup> Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsíng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaû má a nyi kó nghut ri.

<sup>4</sup> Hkrisduq gi, lumjínq bang yuq hkanqmó, dingmán é má wó jé kó sháng gaq ga, jep é tarâ ló htûm jang dut bê nghut ri.

---

✧ 9:33 Esai 8:14; 28:16

<sup>5</sup> Mosheq gi, "Haú pé dông châng é sù gi, haú pé mai asak duì râ nghut lê."✧ ga, jep é tarâ eq sêng é dingmán hkyô lé kê sân kyô tô é nghut lê.

<sup>6</sup> Nghut kôlhang, lumjúng hkyô eq sêng é dingmán hkyô gi, "Náng é myit nhiklhum má, 'Mauhkúng má, ó yuq doq ló râ lú?'✧ (Haú gi, Hkrisduq lé shuí gyó lò râ gá nau é nghut lê),

<sup>7</sup> haú a nghut jáng, 'Nik é jang má, ó yuq gyó wâng râ lú?'✧ (Haú gi, Hkrisduq lé, shi é mai dui toq nhâng râ gá nau é nghut lê.), nghú hkâtaí kó." gâ tô ri.

<sup>8</sup> Haú jáng, hkâsu gâ tô ri lú? "Haú mungdang gi, nàng eq chyâng nyi ri; náng é nhut má le, náng é myit nhiklhum má lé nghut nyi ri."✧ gâ tô ri. Haú gi, ngamoq hko taí é lumjúng hkyô eq sêng é mungdang nghut lê.

<sup>9</sup> Haú mù, "Yesuq gi, Yhumsing nghut ri." nghú náng é nhut eq yín yù mù, Garai Gasang gi, Yhang lé, shi é mai dui toq nhâng bê nghut lê nghú, náng é myit nhiklhum má lumjúng é nghut jáng, nàng gi, hkyi yu é hui râ nghut lê.

<sup>10</sup> Hkâsu mù gâ le, byù gi, myit nhiklhum má lumjúng jáng, mara hkyut san byí é hui mù, nhut mai yín yù jáng, hkyi yù huí é nghut lê.

<sup>11</sup> Haú Chyúmdang taí é gi, "Yhang lé lumhkau é sù ó yuq le, hkâ-nhám lhang hoq hpû é hui râ a nghut."✧ gâ ri.

<sup>12</sup> Hkâsu mù gâ le, Yudaq byù eq tungbàu pê é gyoro má gam hkoq é hkyô haí le a joq é za, haú Yhumsing gi, banshoq bâng é Yhumsing nghut lê

---

✧ **10:5** Nhong 18:5 ✧ **10:6** Tarâ Pun 30:12 ✧ **10:7** Tarâ Pun 30:13 ✧ **10:8** Tarâ Pun 30:14 ✧ **10:11** Esai 28:16

mù, Yhang lé wut dung bang lhunglhang lé, agùn agó shimân byî ri.

<sup>13</sup> Hkâsu mù gâ le, "Haû Yhumsing é myìng lé lhang é bang yuq hkgangmó gi, hkyi yu é hui râ nghut lhê." ☆ gâ tô ri.

<sup>14</sup> Haû nghut lé gi, yhangmoq a lumjìng é sù lé nhìng, hkâsu wó wut dung kó râ l hú? Yhangmoq a wó gyô wú é sù lé nhìng, hkâsu wó lumjìng kó râ l hú? Hko kyô é sù a nyi le nhìng, hkâsu wó gyo kó râ l hú?

<sup>15</sup> Nhang kat é a hui le gi, yhangmoq hkâsu kut wó hko kyo kó râ l hú? Haû eq rajung za, "Gabú danglù pé hko kyo bâng é hkyî-kám pé gi, hkâ-í yhang yúng ri myhi-nhung!" ☆ ga kê tô ri.

<sup>16</sup> Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsîng ê, ngamoq é danglù lé ó yuq wá lumjìng é l hú?" ☆ ga taî ri.

<sup>17</sup> Haû nghut mù luî, lumjìng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê.

<sup>18</sup> Nghut kôlhang, ngò myi kó lé: yhangmoq gi, a wó gyô wú kô é nghut lhê l hú? Yhangmoq gi, wó gyo gù za nghut lhê, haû eq rajung za, "Yhangmoq é htê gi, myidàm htoq banshoq má jàm bê nghut ri;

yhangmoq é mungdang pé gi, mingkan htungchyûn hkgangmó má jé bê nghut ri." ☆

gâ tô ri.

<sup>19</sup> Ngò dum myi kó lé: Israelaq byu pé gi, a sê gyo kô é nghut lhê l hú? Mosheq sâng-hi má taî é gi,

"Byù rahú lháng a nghut bang èq, Ngò, nungmoq lé  
manôn nhâng râ;  
sê gyo nyan a bo é amyù èq, Ngò, nungmoq lé  
wú nhik-yo nhâng râ nghut lhê."✠

gâ ri.

<sup>20</sup> Hau htoq agó, Esai-aq a gyuq a wàm taí é gi,  
"Ngo lé a ho é bang gi, Ngo lé myang hô bekô nghut  
ri;  
Ngá hkyô lé a myí é bang lé, Ngò htoq shit bê  
nghut lhê."✠

gâ ri.

<sup>21</sup> Nghut kôhang, Israelaq byu pé eq séng luí,  
Yhang taí é gi,  
"Ngò gi, jìno a gyô é eq ngegáng-htu é byù myû lé,  
nyí wuî Ngá loq lham mù ji nyi lhê."✠

gâ ri.

## 11

### *Israelaq Byu Pé Lé A He-ngik Pyám*

<sup>1</sup> Haû mù luí, ngò myi kó lé, Garai Gasang gi,  
Yhâng é byu pé lé he-ngik pyám bê nghut lhê lú?  
Ratsuí lháng a nghut! Ngò yhang le, Israelaq byù  
myû nghut luí, Abraham é awut ashín eq Ben-  
yamyin hú mâ é sù nghut lhê.

<sup>2</sup> Garai Gasang gi, Yhang te sê to gû nghut é,  
Yhâng é byu pé lé a he-ngik pyám é nghut lhê.  
Eliyaq eq séng é hkyô Chyúmdang má bo tô é lé,  
nungmoq a sé kó lú? Garai Gasang é hí má,  
yhang, Israelaq byu pé lé mara hûn é gi,

<sup>3</sup> "Yhumsîng ê, yhangmoq gi, Náng é myiqhtoî pé  
lé sat pyám kô é eq Náng é hkungga gyap pé lé tu



lhêng pyâm akô nghut ri; ngò rayuq za myit gyó tô é nghut luí, ngo lé sat râ matú le yhangmoq ho nyi akô nghut ri."✧ gâ ri.

<sup>4</sup> Garai Gasang gi, yhang lé, hkâsu ga tû taí é nghut lhê lhú? Haû gi, "Balaq hpara é hí má hkyihput a htuq shî é byù nyhit hkyíng lé, Ngá é matú myhit to lhê."✧ gâ é nghut lhê.

<sup>5</sup> Haû eq rajung za, ahkuí gi, jeju yanmai hkyin yù huí é bang za myit gyó tô é nghut lhê.

<sup>6</sup> Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

<sup>7</sup> Haû nghut jáng, hkâsu lhú? Israelaq byu pé gyai ho shikut kôlhang, a wó kô é lé, hkyin htoq yù huí é bang kúm gi, wó bekô nghut ri. Góbang gi, myit lhoq htân byí é hui akô nghut ri;

<sup>8</sup> haû gi,

"Garai Gasang gi, hkû-nyí jé shoq, yhangmoq lé nhikshî jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."✧

ga kê tô é eq rajung za nghut ri.

<sup>9</sup> Dawiq taí é le,

"Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

<sup>10</sup> Yhangmoq myoq a wó myâng shoq, myoqjí lhoq chut pyám byí é hui sháng gaq; yhangmoq é nunghkûng gi, ayang wòlai wun goí nhang é hui sháng gaq."✧

✧ 11:3 1 Hko 19:10,14 ✧ 11:4 1 Hko 19:18 ✧ 11:8 Tarâ Pun 29:4

✧ 11:10 Hkya-on 69:22-23

gâ ri.

*Tûngbaù Pé Lé Hkyi Yu É Hkyô*

<sup>11</sup> Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lháng a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pé chyáng jé byuq é nghut lhê.

<sup>12</sup> Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pé é matú wó sùt hkyô dut é nghut jáng, yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

<sup>13</sup> Nungmoq tûngbaù pé lé ngò taí nyi lhê: ngò gi, tûngbaù pé é lagyo nghut nyi é u má, ngá é hpungmù lé hpautap nyi lhê.

<sup>14</sup> Haù gi, ngá é amyû pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lhê.

<sup>15</sup> Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi?

<sup>16</sup> Hau htoq agó, sâng-hî ashi dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

<sup>17</sup> Haù tsanlun akoq pé\* ra-am gi, lhoq hkyui

---

\* **11:17** Tsanlun akoq pé gi, Israelaq byu pé lé taí nau é nghut lhê.

pyâm é hui luî, yosô tsanlun a-nyuq† nghut sù nàng gi, haú pé má xoq é hui mù, haú tsanlun amyit é xù lé bo shuq lom é nghut jáng,

18 akoq haú pé lé hkâwú tiq pyám kó. Nungmoq haú su kut é nghut jáng, nungmoq gi, haú amyit lé htuoq é a nghut é za, amyit haú sheq nungmoq lé htuoq é hkyô lé, nungmoq myit sé keq.

19 Nungmoq kúm gi, "Ngò, haú má xoq é hui râ matú sheq, akoq haú pé gi, lhoq hkyui pyâm é hui é ru nghut lhê." ga taí râ nghut lhê.

20 Haú su gi, nghut lhê. Nghut kôlhang, yhangmoq gi, a lumjínng é yanmai, lhoq hkyui pyâm é hui kômù, nungmoq kúm gi, lumjínng é yanmai, wó ging tîng nyi é nghut lhê. Hká gumrong nyi, gyuq kyum nyi keq.

21 Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun râ a nghut.

22 Haú mù luî, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myháng, nungmoq lé gi, shogyo nhikmyin nyi râ nghut lhê. Haú a nghut jáng, nungmoq le, zân hpyit pyâm é hui râ nghut lhê.

23 Yhangmoq gi, a lumjínng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê.

24 Haí mù gâ le, yosô tsanlun gàm akoq nghut gù nungmoq lé hpyit yû mù, htûng a nghut é đông,

† 11:17 Yosô tsanlun a-nyuq gi, tûngbaù pé lé taí nau é nghut lhê.

hô é tsanlun agàm má xoq é nghut le gi, haû akoq akying pé nghut é yhangmoq gi, ó le ó é tsanlun-  
ngut akying má xoq yu é lé je riyhang hui râ nghut  
lhê ô!

*Israelaq Byu Pé Hkyi Yu É Hui Râ Hkyô*

<sup>25</sup> Haû mù, gumang wuì ê, nungmoq a nghutbun  
kó sháng gaq nghû, zau tô é hkyô shî lé, nungmoq a  
sé dut râ lé, ngò a ô nau é nghut lhê: haû gi, tûngbaù  
pé wang lo é laké byíng é hkûn jé shoq, Israelaq  
byu pé ra-am gi, myit lhoq htan é huí é hkyô nghut  
lhê.

<sup>26</sup> Hau htâng sheq, Israelaq amyû banshoq bang  
hkyi yu é hui râ nghut lhê. Haû gi,  
"Hkyi yù Sû gi, Zi-un bùm mai htoq lô râ nghut lhê;  
Yhang gi, Garai lé nunghtáng tô pyâm é hkyô lé,  
Yakup é awut ashín mai huí sêng pyám byi  
râ nghut lhê.

<sup>27</sup> Ngò, yhangmoq é yubak mara lé huí sêng pyám  
byi jáng,  
haû gi, yhangmoq lé Ngò byî tô é Ngá é dang-  
shikaq nghut lhê."✧

ga kê tô é eq rajung za nghut ri.

<sup>28</sup> Haû gabú danglù eq séng luí ga jang, yhang-  
moq gi, nungmoq é matú gyè nghut akô; nghut  
kôlhang, hkyin htoq yû hkyô eq séng luí ga jang,  
yhangmoq gi, myíng hú é íchýí îwa pê é yanmai,  
chyitdap é huí akô nghut ri;

<sup>29</sup> hkâsu mù gâ le, Garai Gasâng é chyunghuq pé  
eq Yhang ji yu é hkyô lé gi, wó htaî lhik pyâm é a  
nghut.

<sup>30</sup> Nungmoq gi, Garai Gasâng é jìno a gyô é bang radàm dut wú kô é nghut kôhang, yhangmoq jìno a gyô é yanmai, ahkuí kúm, shogyo nhikmyin hkyô wó hkam yù bekô nghut é su,

<sup>31</sup> ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jìno a gyo bang dut bekô nghut ri.

<sup>32</sup> Hkâsu mù gâ le, Garai Gasang gi, byù lhunglhâng bang lé, shogyo nhikmyin hkyô wó tân shit shoq ga, lhunglhâng bang lé, jìno a gyo hkyo é shúm dut nhang to bê nghut ri.

### *Hkya-on Kungtôn Dang*

<sup>33</sup> Ô! Garai Gasâng é agùn agó é sùt nghut é, hpaqchyî byéng-yá eq nyan hpaqchyî gi, hkâ-í yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-í yhang ho htoq wuî jung nghut ri-nhung!

<sup>34</sup> "Haû Yhumsing é myit lé, ó yuq wá ung sê lhê lhú? Yhâng é hpaqchyî byi sù gi, ó yuq wá dut wú é lhú?"<sup>☆</sup>  
gâ ri.

<sup>35</sup> "Garai Gasâng éq jeju dum tau byi râ dut shoq, ó yuq wá, Garai Gasang lé byi wú é lhú?"<sup>☆</sup>  
gâ ri.

<sup>36</sup> Hkâsu mù gâ le, joq mijoq gi, Yhâng chyáng mai nghut mù, Yhang dông mai nghut luí,

Yhâng é matú chyat nghut ri. Haû hpungwup  
shing kang gi,  
Yhâng chyáng ahtum abyuq ru joq nyí sháng gaq ô!  
Amen.

## 12

### *Dui É Hkungga Pé Dut Râ Hkyô*

<sup>1</sup> Haû mù luí, gumang wuì ê, nungmoq é gungdu pé lé, Garai Gasang myit nguì ô nau é eq chyoiyúng é, dui é hkungga dông nhông byi keq nghú, Garai Gasâng é shogyo nhikmyin hkyô mai, ngò, nungmoq lé wum byí kat lhê. Haû gi, woi-nyí hkyô dông nungmoq noqkuq dojaú é hkyô nghut lhê.

<sup>2</sup> Mingkan shí lhûm é sâmlai dông a cháng lo é za, myit sik wó yû râ dông nungmoq é a-kyang lé htaí pyám byi nhâng keq. Haú hkûn sheq, Garai Gasâng é ge é, myit nguì é eq gumjup é ô nau hkyô lé, nungmoq wó chyâm, wó sê gàm hkoq yû kó râ nghut lhê.

<sup>3</sup> Hkâsu mù gâ le, ngo lé byí tô é jeju yanmai, nungmoq yuq hkan gmó lé ngò tái kôlé: nungmoq gi, yhumsing gùng lé lai shoq a nghutbûn é za, ó le ó lé, Garai Gasâng eq lumjín g myit tsing gàm byí to bê eq rajung za, myit yù gín g é í za myit yù keq.

<sup>4</sup> Nga-nhúng yuq hkan gmó é gungdu ralhum má gi, gungdu showui showang pé myo myo bo é nghut luí, gungdu showui showang haú pé ban-shoq gi, jai chùng jang a pung é nghut lhê.

<sup>5</sup> Haû eq rajung za, myo myo nghut é nga-nhúng le, Hkrisduq má gungdu ralhum za dut luí, yuq hkan gmó gi, rayuq eq rayuq gungsho sêng lhûm é bang chyat nghut lhê.

<sup>6</sup> Nga-nhúng lé byî tô é jeju yanmai, nga-nhúng wó é chyunghuq gi, gotû tû nghut lhê. Byù rayuq é chyunghuq gi, myiqhtoi htoî é nghut jáng, yhâng é lumjǎng hkyô eq rajung za htoi sháng gaq;

<sup>7</sup> dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq;

<sup>8</sup> myit wum byî é nghut jáng, myit wum byi sháng gaq; ra châ é bang lé garúm byî é nghut jáng, a ha bûn é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit èq kut sháng gaq.

### *Chyitdap Myit*

<sup>9</sup> Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit túi nyî keq.

<sup>10</sup> Rayuq eq rayuq, gumang chyitdap myit mai lhumzuî lhum keq. Rayuq eq rayuq, yhumsing gùng htoq je hpautap lhum keq.

<sup>11</sup> Myit zuq hkyô má, hkâ-nhám le wum a lhoq shôm é za, nungmoq é woi-nyî hkyô má myit toq nyî mù, haû Yhumsîng lé dojaú nyî keq.

<sup>12</sup> Myit myoqbyù hkyô má gabú keq; wuîhke hkyô má hkam jan keq; kyûdung hkyô má lhumzui keq.

<sup>13</sup> Ra châ tô é Garai Gasâng é byu pé lé gàm byi keq. Bǎng hkulum é lé rago kut keq.

<sup>14</sup> Nungmoq lé zing-rí é bang lé shimân byi keq; shimân byi keq, hkâ-nhing kó.

<sup>15</sup> Gabú é bang eq rahá bo gabú keq; yón é bang eq rahá bo yón keq.

16 Rayuq eq rayuq byìn hpyé gohut huí nyì keq. A nghutbùn é za, nyì yap hkyô nyhùm bang eq zùm yap keq. Hpaqchyí bo é sù su hkâ-myit ngàm kó.

17 Ó yuq lé le, agè ashop é yanmai, agè ashop é dông lató hkâhpuq kó. Yuq hkgangmó é myoq hí má ge é lé kut râ rago myit keq.

18 Wó dut é nghut jáng, nungmoq wó dut é í, yuq hkgangmó eq nguingón shoq nyì keq.

19 Ngá é buinùm wuì ê, lató a hpuq é za, Garai Gasâng é nhikmo-yo hkyô lé sheq láng nyì keq. Hkâsu mù gà le, "Ngò sheq lató hpuq râ sù nghut lhê; ngò lató hpuq râ."✧ ga, haù Yhumsing taì ri ga kâ tô ri.

20 Haù mù,  
"Nungmoq lé gyè kut sù zòmut é nghut le gi, byi tso keq; yhang wuìshit é nghut le gi, rajung jung byi huq keq.

Haù dông kut jáng, nàng, yhâng é ulhum htoq má gyúng é myigye bum to byì é nghut lhê."✧  
ga le kâ tô ri.

21 Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

## 13

### *Ahkáng Ayá Wó Bàng Ô Má Nyì Râ É Hkyô*

1 Yuq hkgangmó gi, up é ahkáng ayá wó bàng é a-ô má nyì ra râ nghut lhê; hkâsu mù gà le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byì tô é chyat nghut lhê.



<sup>2</sup> Hau é yanmai, up é ahkáng ayá lé gumlau toq é sù gi, Garai Gasang byi tô é up é ahkáng ayá lé gumlau toq é sù nghut ri; haû su kut é bang gi, tarâ jéyáng é hui zo râ hkyô lé ho yù nyi é bang nghut akô.

<sup>3</sup> Hkâsu mù gâ le, uphkang é bang gi, ge é hkyô kut bâng é matú gyuq nán hpo a dut é za, shut shaî hkyô kut bâng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lí? Haû jáng, ge é hkyô kut aq, haú hkûn, yhang, nang lé hkya-on râ nghut lhê.

<sup>4</sup> Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôlhâng, nâng, shut shaî hkyô kut é nghut le gi, gyuq nán nyi aq; haî mù gâ le, yhang gi, sâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaî hkyô kut sù lé dam byi râ matú nhikmo-yo Su é gunglik nghut lhê.

<sup>5</sup> Haû mù luî, dam byi râ lé chiq é yanmai za a nghut, yhumsîng nhik bô râ é yanmai le, haû up é ahkáng ayá wó bâng é a-ô má nyi râ dut lhê.

<sup>6</sup> Nungmoq hkansê kat râ é gi, hau é yanmai le nghut lhê; hkâsu mù gâ le, haû up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkang é mù lé, ahkyíng byíng shoq wùn waq nyi akô nghut ri.

<sup>7</sup> Yuq hkanmó lé byi âng é eq rajung za byi keq; hkansê kat byi ang sù lé gi, hkansê kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

### *Rayuq Eq Rayuq Chyitdap Lhum Râ Hkyô*

<sup>8</sup> Rayuq eq rayuq chyitdap lhûm é chyîn mai lai luî, hai chyîn le hkâdap lhum kó; hkâsu mù gâ le, góyuq lé chyitdap é sù gi, haû jep é tarâ lé lhoq dik bê sù nghut ri.

<sup>9</sup> "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"<sup>✧</sup> gâ tô é hkunmó pé eq gotû hkunmó haî nghut nghut, "Náng gûng lé nàng chyitdap é su, náng é chyangnâm mâ é bang lé le chyitdap aq."<sup>✧</sup> gâ é tarâ má lo jup to bê nghut lhê.

<sup>10</sup> Chyitdap myit gi, chyangnâm mâ é byù lé a ge é haî le a kut é nghut lhê. Haû mù luî, chyitdap myit gi, haû jep é tarâ lé lhoq dik é hkyô nghut ri.

<sup>11</sup> Haû mù, ahkuî lhê é ahkyíng yàm-yoq lé sê gyo luî, haû hkyô lé kut keq. Nungmoq yhup mui é mai bûn gying râ ahkyíng jé bê; haû mù gâ le, nga-nhûng é hkyi yù hkyô gi, lumjíng hi é hkun lhê htoq má ahkuî je chyáng bê nghut ri.

<sup>12</sup> Haû myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haû mù luî, mauchut é muzó lé tô pyám mù, maubó é gyecking lé wut to sháng.

<sup>13</sup> Ye lhaî é eq shuq wut é, ashop é dông gungsho zùm yap é eq shut é dông nyi zô lhúm nau é myit bo é, mabyoq jishûm htoq é eq manon é pé a kut é za, nyí-káng lhê su, ge é a-kyang dông nyi yap sháng.

<sup>14</sup> Hau htoq agó, Yhumsîng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myit kó.

# 14

## *Gumang Wui Lé A Jéyáng Râ Hkyô*

<sup>1</sup> Lumjínq myit má wum nyhóm sù lé, myíng myo nhô zâ é hkyô pé lé a jéyáng byî é za hap yù keq.

<sup>2</sup> Byù rayuq é lumjínq myit gi, jung hkangmó zô ri; nghut kôlhang, lumjínq myit nyhóm sù gotù rayuq gi, mhan-haq hpoqnoq za zô ri.

<sup>3</sup> Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri.

<sup>4</sup> Nàng gi, ó yuq wá nghut mù, góyuq é dui-nhâng zoshâng lé jéyáng lhê lú? Yhang, yap ging kôlhang, leqbat kôlhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haù Yhumsing gi, yhang lé wó yap ging nhâng Sù nghut lhê.

<sup>5</sup> Rayuq myit é gi, buinyì ra-nyí gi, gó nyí htoq je ge lhê gâ ri; dum rayuq myit é gi, nyí wuí rajung za nghut lhê gâ ri. Yuq hkangmó gi, yhumsing myit yu é lé a úng-âng nyì sháng gaq.

<sup>6</sup> Buinyì ra-nyí lé, ahkyak lhê ga myit yù sù gi, haù Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haù Yhumsing lé bun luí zô nyi ri; a zo sù le, haù Yhumsing lé bun luí Garai Gasang lé jeju hkya-ôn nyi ri.

<sup>7</sup> Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut.

<sup>8</sup> Nga-nhúng asak dui nyi le gi, haù Yhumsing é matú dui é ru nghut lhê; nga-nhúng shi byuq le gi,

haû Yhumsing é matú shi é ru nghut lhê. Haû mù, asak dui nyi kôlhang, shi byuq kôlhang, nga-nhúng gi, haû Yhumsing eq sêng é bang nghut lhê.

<sup>9</sup> Haû su mù, Hkrisduq gi, shi byuq bang eq asak dui bâng é Yhumsing dut sháng gaq ga, shî hkám mù dum dui toq é nghut lhê.

<sup>10</sup> Haû mù, nàng gi, haî mù náng é gumang hpó lé jéyáng nyi lhê lú? Haî mù náng é gumang hpó lé wú tiq nyi lhê lú? Nga-nhúng lhunglhang bang gi, Garai Gasâng é tarâ jéyáng tanghkuq hí má yap râ bang chyat nghut lhê.

<sup>11</sup> Hkâsu mù gâ le,

"Haû Yhumsing gi, 'Ngò rû dui nyi é eq rajung za, Ngá é hí má hkyihput hkangmó htug râ nghut lhê;

Garai Gasang lé, shô hkangmó èq yín yû kó râ nghut lhê.' ga taî ri."✧

ga kâ tô ri.

<sup>12</sup> Haû mù luî, nga-nhúng yuq hkangmó gi, yhumsing kut lai lo é hkyô lé, Garai Gasâng chyáng shit ra râ nghut lhê.

<sup>13</sup> Haû nghut mù, nga-nhúng gi, rayuq eq rayuq tarâ jéyáng lhûm é hkyô lé tô pyám sháng. Ó yuq nghut kôlhang, yhumsing é gumâng é hkyowui má, myit leqbat jowò eq htung hê jowò a to byi râ matú, myit sidiq keq.

<sup>14</sup> Haû Yhumsing Yesuq má nghut nyi é sù ngò gi, haî jung zoshuq nghut kôlhang, yhang baú yhang a sansêng a dut é hkyô lé, hkyak wó sé luî, jing nyi lhê. Nghut kôlhang, ó yuq le, rajung jung lé a

sanséng ga myit yu é nghut jáng, yhang é matú, zè haû gi, a sansêng é nghut lhê.

<sup>15</sup> Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shî hkám byi bê sù nghut é, náng é gumang hpó lé, nàng zoshuq é dông mai hkâlhoq hten pyám.

<sup>16</sup> Nàng, ge ri nghû myit yu é hkyô lé, agè ashop é dông hkâtaî pyám nhâng.

<sup>17</sup> Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, ngingón hkyô eq Chyoiyúng Woi-nyí má gabú é hkyô ru nghut lhê.

<sup>18</sup> Haî mù gâ le, shí hkyô dông mai Hkrisduq lé dojaú é sù gi, Garai Gasâng ô nau é sù eq byu pè èq hkya-ôn é hui sù nghut ri.

<sup>19</sup> Haû mù luî, ngingón hkyô má nyi râ eq, rayuq eq rayuq wum byî lhum râ hkyô lé, shikut nyi keq.

<sup>20</sup> Zoshuq é yanmai, Garai Gasâng é muzó lé hkâlhoq hten pyám. Zoshuq lhunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê.

<sup>21</sup> Tsibiyiq wing shuq é eq sho zô é hkyô má nghut kôlhang, gotû haî jung kut é nghut kôlhang, náng é gumang hpó lé myit leqbat nhang é nghut le gi, a kut le je ge lhê.

<sup>22</sup> Haû mù, haú pé eq séng luî, nàng lumjíng é haî nghut kôle, nàng eq Garai Gasâng gyoro má za joq nyi sháng gaq. Yhumsíng ge lhê gâ é èq, yhumsing gùng yhumsíng mara byi jang a joq é sù gi, hkungsô wó nyi ri.

<sup>23</sup> Nghut kôlhang, úng-âng é myit eq zô é nghut le gi, mara byî é huî ri, haî mù gâ le, yhang zô é gi, lumjínq myit mai a nghut; lumjínq myit mai a kut é haî nghut kôlhang, mara nghut ri.

## 15

### *Góyuq Lé Myit Ngón Nhâng Râ Hkyô*

<sup>1</sup> Lumjínq hkyô má wum-o bo é nga-nhúng gi, yhumsínq myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byî nyî râ dut lhê.

<sup>2</sup> Nga-nhúng yuq hkangmó gi, yhumsínq é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byî nyî sháng.

<sup>3</sup> Hkâsu mù gâ le, Hkrisduq lháng gi, Yhânggùng yhang lhoq ngón é a nghut; haû gi, "Nang lé rhoî bâng é dang gi, Ngá chyáng gyó ke bê nghut ri."✧ ga, kê tô é eq rajung za nghut ri.

<sup>4</sup> Hkâsu mù gâ le, laî lò bê hkûn kê tô é lhunglháng gi, nga-nhúng lé mhoq byi râ matú chyat kê tô é nghut lhê; haû gi, Chyúmdang mâ é hkam jan hkyô eq myit wum byi hkyô dông mai, nga-nhúng myit myoqbyù hkyô wó râ matú nghut lhê.

<sup>5</sup> Haû hkam jan hkyô eq myit wum byi hkyô lé byî é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhum za dut é woi-nyí byi sháng gaq;

<sup>6</sup> haû jáng sheq, nungmoq gi, i-myt rahkat eq nhut htê ralhum eq za, nga-nhúng é Yhumsínq

---

✧ 15:3 Hkya-on 69:9

Yesuq Hkrisduq é Yhângwa nghut Sû, Garai Gasang lé, wó hkya-on kungtôn kó rà nghut lhê.

<sup>7</sup> Haû mù luî, Hkrisduq gi, nungmoq lé hap yù bê é eq rajung za, Garai Gasâng é hpungwup shingkang lé lhoq htoq shit râ matú, nungmoq le, rayuq eq rayuq hap yu lhum keq.

<sup>8</sup> Hkâsu mù gâ le, ngò, nungmoq lé taí kôlé, haû mying hû é îchyí îwâ pé lé byî tô é danggidiq pé lé lhoq ging râ matú, Hkrisduq gi, Garai Gasâng é tengmán hkya é malaî, Yudaq byu pê é dui-nhâng zoshâng dut bê nghut ri.

<sup>9</sup> Haû mù, Garai Gasâng é shogyo nhikmyin hkya é yanmai, haû tûngbaù pé, Garai Gasang lé wó hkya-on kungtôn kó rà nghut lhê. Haú hkyô gi, "Haû mù luî, tûngbaù pé chyáng má, Nang lé, ngò hkya-on rà nghut lhê;  
Náng é mying lé, ngò hkya-on mahkôn rà nghut lhê."✧

ga kê tô é eq rajung za nghut ri.

<sup>10</sup> Dum,

"Tûngbaù pé ê, Yhâng é byu pé eq rahá gabú nyi keq."✧

gâ tô ri.

<sup>11</sup> Dum,

"Nungmoq tûngbaù pé lhunglhâng bang ê, haû Yhumsing lé hkya-on keq, byù myú lhunglhâng bang ê, Yhang lé hkya-on mahkôn hkôn keq."✧

gâ tô ashî nghut ri.

<sup>12</sup> Hau htoq agó, Esai-aq taî é gi,

---

✧ 15:9 Hkya-on 18:49 ✧ 15:10 Hkya-on 32:43 ✧ 15:11 Hkya-on 117:1

"Yese é Amyit gi, yuq htoq lô luî, Yhang gi, byù myû chângjup é ahtoq má up râ sù nghut lhê; tûngbaù pé gi, Yhang má myit myoqbyù kó râ nghut lhê."✧

gâ ri.

<sup>13</sup> Haù myit myoqbyù hkyô byî é Garai Gasang gi, Yhang lé lumhkau nyi é bang nungmoq lé, gabú hkyô banshoq eq nguínón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyi kó râ nghut lhê.

*A Gyuaq A Wam É Za, Poluq Laiká Kâ É Hkyô*

<sup>14</sup> Ngá é gumang wuì ê, nungmoq gi, ge é hkyô byíng jup é bang, hpaqchyî má gumjup é bang, rayuq eq rayuq mhoqshit lhûm é má kûng é bang nghut é lé, ngá gûng ngò yhang hkyak lumjínghê.

<sup>15</sup> Ngò gi, nungmoq lé dum lhoq pûn é dông, ahkyak é pé ra-am lé a gyuaq a wàm kâ kat bê nghut lhê.

<sup>16</sup> Hkâsu mù gâ le, tûngbaù pé gi, Chyoiyúng Woi-nyí dông mai lhoq sân-yúng é hui luî, Garai Gasâng èq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tûngbaù pé chyáng, Hkrisduq Yesuq é hpungmù wùn sù dut râ matú, Garai Gasang, ngo lé jeju byî é yanmai nghut lhê.

<sup>17</sup> Haù mù luî, ngò gi, Garai Gasang lé dojaú é hkyô eq séng luî, Hkrisduq Yesuq má nghutbùn nyi lhê.

<sup>18</sup> Ngò gi, ngò taí é eq zui saí é muzó dông le, haù Woi-nyí é a-tsâm chûng mù, kumlhá pé eq laklaí



kumlhá pé dông le, tûngbàu pé lé, Garai Gasâng é jino gyo shoq shuî û é má, ngo lé Hkrisduq nhang é muzó hkyô lé taî é mai lai luî, gotû haî lé le wám taî é a nghut.

<sup>19</sup> Haû mù luî, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê.

<sup>20</sup> Ngò hkâ-nhám le myit tuî nyi é hkyô gi, góyuq hi tô é apûn awang má dum a puq saî pyâm é za, Hkrisduq lé a sé shi é jowò má gabú danglù hko kyo râ hkyô nghut lhê.

<sup>21</sup> Haû gi,  
"Yhâng é hkyô lé, taî kyô é a hui shî é bang, myàng kó râ nghut luî,  
a wó gyô wú é bang, sê gyo kó râ nghut lhê."☆  
ga kê tô é eq rajung za nghut ri.

<sup>22</sup> Haû mù luî, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

### *Romaq Myuq Lé Ló Kum Râ Sôn É Hkyô*

<sup>23</sup> Nghut kôlhang, ahkuî gi, shí mau pé má ngò zui saî râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za,

<sup>24</sup> ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haû mai htuqbang kat râ lé, ngò myoqbyu tô lhê.

---

☆ 15:21 Esai 52:15

25 Ahkuî, ngò kúm gi, Yerusalem wà mó mâ é sân-yúng bang lé dojaú râ matú, haú wâ shut e ló é hkyolat má nghut nyi lê.

26 Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri.

27 Yhangmoq gi, haú su kut nau bùm bekô nghut ri, gè gè ga jáng, haú gi, yhangmoq chyîn dap tô é đông ru nghut lê. Hkâsu mù gâ le, haú Yudaq byu pê é woi-nyí eq sêng é shimân jeju lé, tûngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chùng râ chyîn dap tô é đông nghut lê.

28 Haú mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, laí ló uchyang, nungmoq chyáng lé sô kum râ nghut lê.

29 Ngò gi, nungmoq chyáng lé jé é hkún, nungmoq é matú Hkrisduq é shimân jeju byíng jup é èq jé lé râ nghut é lé, ngò sê lê.

30 Gumang wuì ê, ngá é matú Garai Gasâng chyáng kyûdung byí é đông, ngò wum kat yhang shikut é hkyô má nungmoq bo wàng lòm râ matú, nga-nhùng é Yhumsîng Yesuq Hkrisduq eq Woi-nyí é chyitdap myit é yanmai, ngò, nungmoq lé wum tâi tsuq kat lê.

31 Yuda mau mâ é a lumjíng bâng chyáng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sân-yúng bang hap yù gíng é wó dut râ matú kyû bo dung byi keq.

<sup>32</sup> Haû jáng sheq, ngò gi, Garai Gasang ô nau é dông mai, gabú myit eq nungmoq chyáng wó jé lé mù, nungmoq eq rahá wum-o wó yû râ nghut lhê.

<sup>33</sup> Haû nguingón hkyo é Garai Gasang gi, nungmoq banshoq bang eq rahá rû nyi nyi sháng gaq ô. Amen.

## 16

### *Shi-kyám Dang*

<sup>1</sup> Ngò gi, Kenhkrea noqkuq hpúng má é hpungtê, nga-nhúng é gu-nhá Hpobe lé, nungmoq chyáng shichyen byi kat lhê.

<sup>2</sup> Nungmoq gi, sân-yúng bang kut gíng é eq rajung za, haû Yhumsîng má yhang lé hap yû luí, yhang râ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sù nghut lhê.

<sup>3</sup> Hkrisduq Yesuq má ngò eq mô wùn luzúm nhik nghut é, Priskila eq Akula lé bo shi-kyám byi keq.

<sup>4</sup> Yhangnhik gi, ngá é asak é matú, yhangnhik é asak sum râ í yhang dut wú kô é nghut mù, ngò za a nghut, tûngbaù pé é noqkuq hpúng pé banshoq le, yhangnhik lé jeju bûn lhê.

<sup>5</sup> Yhangnhik é yhûm má chôm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sângh-lumjîng wang lo é, ngò chyitdap é Epanetu lé bo shi-kyám byi keq.

<sup>6</sup> Nungmoq é matú gyai yhang shikut wú bê sù nghut é Mariq lé bo shi-kyám byi keq.

<sup>7</sup> Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sù nhik nghut akô.

<sup>8</sup> Haû Yhumsîng má, ngò chyitdap é sù, Ampliatu lé bo shi-kyám byi keq.

<sup>9</sup> Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

<sup>10</sup> Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

<sup>11</sup> Ngá é buinùm Herudion lé bo shi-kyám byi keq.

Haû Yhumsîng má nghut nyi bê bang, Narkiso é yhumbyù wuì lé bo shi-kyám byi keq.

<sup>12</sup> Haû Yhumsîng má mù zui shikut é myiwê nhik, Truhpena eq Truhposa lé bo shi-kyám byi keq.

Haû Yhumsîng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

<sup>13</sup> Haû Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.

<sup>14</sup> Asunkritu, Hpelegon, Herme, Patroba, Herma eq yhangmoq eq rahá nyi é gumang wuì lé, bo shi-kyám byi keq.

15 Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

16 Rayuq eq rayuq, chyoiyúng bopuq é eq shi-kyâm lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

17 Gumang wui ê, nungmoq é lumjíng hkyô má, nungmoq mhoq hkam yù bê nghut é mhoqshit hkyô eq shai lhùm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taî tsuq kat lhê. Yhangmoq lé koi pyám keq.

18 Hkâsu mù gâ le, haû sù é bang gi, nga-nhûng é Yhumsîng Hkrisduq lé dojaú é bang a nghut é za, yhumsing é wamdaû matú dojaú é bang nghut akô. Yhangmoq gi, myit nú-nhâm é bang lé, dang ngón dang nguî dông mhaú zô akô nghut ri.

19 Nungmoq, jino gyo kô é hkyô lé, yuq hkangmó wó gyo bê nghut ri; haû mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luî gi, nungmoq hpaqchyî bò mù, agè ashop hkyô eq séng luî gi, nungmoq a bo lòm râ lé, ngò ô nau ri.

20 Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyi sháng gaq ô.

21 Ngá é mù zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

<sup>22</sup> Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

<sup>23</sup> Ngo lé le, noqkuq hpúng gón lé le, bing hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhông é gumang hpó Kuartu gi, nungmoq lé shi-kyám dang sang kat akô.

<sup>24</sup> Nga-nhông é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyî sháng gaq. Amen.\*

<sup>25</sup> Byù myû chângjup bang lumjîng luî, Yhang é jìno gyo sháng gaq ga, a-nham pyat mai haq tô é hui kôlhâng,

<sup>26</sup> ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuî é hkyo é shing-rán má cháng luî, ngá é gabú danglù eq Yesuq Hkrisduq é hkyô tai pyo é dông, nungmoq lé wó lhoq ging tíng byî é,

<sup>27</sup> rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shíngkang gi, ahtum abyuq ru joq nyî sháng gaq ô! Amen.

---

\* **16:24** Chyúmding ra-am má chyúmbun 24 shî a bo é nghut lhê.

# **Chyoiyúng chyumlaiká: dangshikaq asik; Zaiwa**

## **New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

23f9fc55-a8a4-59ef-9513-707ec336b0ee